

Širawt ta tazzarat iktab Buləs i Kəl-Korent İsənti

Təhult

¹ Awa nak Buləs, iyrâ Məššina day tara-net əs tišit n ənammazul ən Elməsix Yaysa. Nak d amadrax-nana Sustinəs

² nəhul-in İlkənisat ən Məššina ta təhat ayrəm ən Korent. Iyr-et y ad təqqəl tamattay-net zəddigat, təhât təla-net s əssəbab ən tassaq-nasan d Elməsix Yaysa; ənta d aytedan kul win hadatnen edag əhan, əxbâdan Əməli-nana Yaysa Elməsix, imosan Əməli-nasan, imos dəx wa-nana.

³ Məššina di n Abba-nana, d Əməli-nana Yaysa Elməsix təkfeq-qawan arraxmat d alxer.

Igodan

⁴ Faw tigudəyax i Məššina di n Əməli-nin day talxa-nawan, tehakkay ta kawan-iga arraxmat-net s əssəbab ən tassaq-nawan d Elməsix Yaysa.

⁵ Fəlas tassaq-nawan dər-əs a sər-wan d-ewayan as kawan-isabbalal day arat kul, wəllen day awa təgannim kul d awa təssanam kul.

⁶ Isalan ən Yaysa win nəga əttiddan xur-wan wəllen.

⁷ Adi as wər tu-təlla təhəkkut ən Məššina wər təgrewam, kawanay win waraxwaraxnen i tawaylay n Əməli-nana Yaysa Elməsix;

⁸ s ənta a z'isəssuhen əzəgzan-nawan har təzərəst, awəd-du fall-awan əzəl wa du-z-asu wər kawan-iwer lahan waliyyan.

⁹ Məşşina di kawan-d-iḡran y ad tərtəyam əd Barar-net Əməli-nana Ҳaysa Əlməsix, wər d-itəqqəl daḡ tənna-net.

Etəwətəytay n Əlməsix d ənəmənnək n əlməsixitan

Iba n ənəmənnək daḡ Əlkənisat

¹⁰ Imədrayan-in, əgmâya daḡ-wan fəl udəm n Əməli-nana Ҳaysa Əlməsix ad tənəmənnəkam ketnawan daḡ awa təgannim, taqqamim wər təqqelam təzunen. Kalar nəmənnəkət daḡ awa təsamadranam d awa tənnəyem.

¹¹ Fəlas imədrayan-in, əgân daḡ-i aytedan n aḡaywan ən Kələway isalan n as, təlla gar-ewwan tamazaq.

¹² Ənnəḡ adi fəlas wiyyad daḡ-wan gannin: «Nakkanay Buləs as nəlkam», wiyyad gannin «Nakkanay Abbolos as nəlkam», wiyyad gannin «Nakkanay Butros as nəlkam», wiyyad gannin: «Nakkanay Əlməsix as nəlkam».

¹³ Awak Əlməsix təzunt a iga? A təḡilam nak Buləs, a itawānḡan fəl təgəttawt fəl əddəlil ən bakkadan-nawan? Məḡ ak esəm wa-nin Buləs as tətawasalmaḡam daḡ aman?

¹⁴ Əggodayaḡ i Məşşina âs wər daḡ-wan əssəlməḡaḡ awedan waliyyan daḡ aman, ar Krisbəs əd Gayəs.

¹⁵ Daḡ adi wər t-illa awedan ifrâḡan ad annu itiwasalmaḡ daḡ aman s esəm-in fəl ad iqqəl ənalkim-in.

16 Awalla, əkte-du as əssilməyə dəy aman aytedan n ahan n Əstefanos əntanay da. A wər nəmos aytedan win, wər kəttəwəx id əssilməyə dəy aman awedan iyyan.

Ətəwətəytay n Əlməsix issikna tarna əd masnat šin Məššina

17 Fəlas wər di-d-izammazal Əlməsix fəl ad əssəlməyəy aytedan dəy aman, kalar izimazal-i-du fəl a dasan-əmələy isalan n Əlinjil, ağax-asan dəx emel wər nəga əs masnat n awal, fəl ad wər tabbannan tamattant n Əlməsix fəl təgəttawt, təqqəl arat wər nəla almayna.

18 Tidət as, isalan ən tamattant ən Yaysa fəl təgəttawt, xur aytedan win əhanen tarrayt n əhluk, isalan wər nəla almayna a əmosan; mišan nakkanay win əhanen tarrayt n əlxillas, nəssân as tarna ən Məššina a əmosan.

19 Isalan n awen da a dəy ənnan Əlkəttaban: «Ad səbbənnana masnat ən musanan, səbbənnana dəx tayttay ən malan ən tayttay.»

20 Dəy adi ma din-igan dəy musanan? Ma din-igan za dəy musanan n Əttawret? Imusanan n awal n azzaman win den, əntanay ma dəy-san in-igan? Wərgəx Məššina issəkna as, masnat ta əlan aytedan n əddənet ta, əmməskəl a təmos?

21 Fəlas Məššina a igan əs masnat-net as aytedan wər əfregan a t-əssənan əs masnat tanasan iman-nasan, adi a fəl igrax i Məššina ad ixləs aytedan win sər-əs əzzəgzannen əs tarrayt ən salan n Əlinjil əmosnen əmməskəl s aytedan win sər-əs wər nəzzəgzan.

22 Kəl-Əlyəhud za əntanay gammayan a dasan-ətəwəgginat təlməxjujaten əmosnen

alɣalamaten, Kəl-Əlyunan amaran gammayan masnat.

²³ Adi a fəlas nakkanay emel wa nətaggu tamattant n Əlməsix fəl təgəttawt, təsənkəft a imos i Kəl-Əlyəhud a dasan-təgdâlat əzəgzan, aytedan amaran win wər nəmos Kəl-Əlyəhud əntanay imos xur-san əmməskəl.

²⁴ Mišan xur aytedan win iɣra Məşşina, gər za Kəl-Əlyəhud wala dəx Kəl-Əlyunan, Əlməsix tarna əd masnat ən Məşşina a imos.

²⁵ Fəlas igi ən Məşşina wədi imosan s aytedan əddi əmmiskəl, wər tu-tewed masnat n aggadəm. Igi-net dəx wədi imosan s aytedan iba ən təla ən tanaya, wər tu-təlla tarna n aggadəm wər oger.

²⁶ Ya imədrayan-in, aktiwat-du awa təmosam as kawan-d-iɣra Məşşina. Wər dəx-wan əggətan aytedan as itiwagga iduf n as əmosan imusanan, wala wiyyad əlanen fərregat, wala wiyyad əmosnen kəl əket.

²⁷ Kalar Məşşina isannafran aratan win wər nəla almayna xur aytedan n əddənət ta fəl ad izzəbəz imusanan təkarakit. Isannafran dəx win wər nəla fərregat dəx əddənət ta fəl ad izzəbəz təkarakit aytedan win əlanen fərregat.

²⁸ Awa itawalkan dəx əddənət ta, d awa itawakyadan, əd wa wər nətəwagga wala a isannafran Məşşina y a sər-san assabu tamayyamayt ən win əmosnen arat xur aytedan.

²⁹ Arat wen kul, ig-ay Məşşina fəl ad dat-əs wər idkəl awedan waliyyan iman-net.

³⁰ Kawanay amaran Məşşina a kawan-osaxan əd Ƴaysa Əlməsix, s ənta a danax-iqqalan mas-

nat a du-təfâlat Məşşina – almayna ikf-ana sər-əs taqqat, əd tazdak, əd tədarfit.

³¹ Adi a fəl ənnan Əlkəttaban: «Awədan wa iran adkul ən man-net, idkəlet-tan fəl aššaddat n awa iga Məşşina.»

2

¹ Nak iman-nin, imədrayan-in, as kawan-in-osey y a dawan-əməla tidət ta du-təfalat Məşşina təmosat əssir, wər kawan-əssəkna masnat n awal wala igət ən masnat.

² Fəlas əgey tanat n as, iket əheq-qawan, wər dawan-z-agay isalan wər nəmos win Yaysa Əlməsix, d ətəwənxa wa itawagga fəl təgəttawt.

Masnat ta n Məşşina isannafalal-tat Infas wa Zəddigan

³ Nak azzaman win xur-wan əge, əgeq-qan d iba n assahat əd tasa di-təssindawat taysəst labasat.

⁴ Amaran isəssəxritan-in əd təlxutbaten-in wər əgen əs masnat n awal wala təla ən tayttay, kalar isəssəxritan a əmosan as issikna Infas wa Zəddigan əs tarna-net as tidət a əmosan,

⁵ fəl ad iqqəl əzəgzan-nawan arat a sər-wan du-teway tarna ən Məşşina wərgex masnat n aggadəm.

⁶ Dər iga awen da ya, tidət as, təll-ay masnat nəsasaxru aytedan win saggatakkənən dəy əzəgzan; mişan masnat ten, wər tat-təla əddənət ta, za wər tat-əlen muzaran-net as ilkâm ad iba tamayyamayt-nasan.

⁷ Kalar masnat ta du-təfalat Məşşina a nəsasaxru, təmosat əssir irəwan ixbâr y

aytedan. Masnat ta, harwa dat əxluk n əddənet ad otas Məşšina a dana-sər-əs-akfu adkul.

⁸ Wər t-illa day muzaran n əddənet ta da, i igrâwan əgərri ən ta da masnat; fəlas ənnar tat-əgrân, wər z'attaytayan Əməli ən tanaya.

⁹ Dər iga awen da ya ənnan Əlkəttaban: «Awa issənsa Məşšina i win t-əranen, wər kala tu-tənay şat, wər kala tu-təsla təməzzuk, wər kala dey ad t-isammadrən awedan.»

¹⁰ Nakkanay amaran isannafalal-anaq-qu Məşšina əs tarrayt n Infas wa Zəddigan; fəlas Infas wa Zəddigan wər t-illa a day wər issen, wala ɣas aratan win as otas Məşšina igi-nasan da issân day-san.

¹¹ Id wər t-illa awedan issânan awa ihan iman n iyyan awedan, ar iman n awedan wədi da ɣas. Əmmək di day as, wər t-illa awedan issânan awa otas Məşšina. Infas-net di Zəddigan ɣas a t-issanan.

¹² Amaran nakkanay, wərgex infas şilat ən wa n əddənet a nəgraw, kalar infas wa d-ifalan Məşšina a nəgraw, fəl ad nagru arraxmaten şin fall-ana d-izazzabbat Məşšina.

¹³ Adi a fəlas, aratan win nəsasaxru, wər tan-nəsəsəxru əs masnat ta n aggadəm, kalar masnat ta danaɣ-ihakku Infas wa Zəddigan as tan-nəsasaxru. Nəsasagru tidət ta du-təfalat Məşšina y aytedan win iha Infas di Zəddigan ən Məşšina.

¹⁴ Mişan awedan wa wər nəlkem ar i masnat ta n aggadəm, wədi wər ifreg ad iqbəl arat wa d-ifalan Infas di Zəddigan ən Məşšina, id ɣur-əs əmməskəl a imos awen, wər ifreg ad t-agru fəlas Infas di Zəddigan ən Məşšina a ihakkan əgərri-

nnet.

¹⁵ Awedan wa iha Infas wa Zəddigan, wər t-illa arat a d-ifalan Məşşina as wər ifreg əgərri-nnet, amaran ənta iman-net, wər t-illa awedan wər iha Infas wa Zəddigan ifrâgan a sər-əs annu arat.

¹⁶ Adi a fəl ənnan Əlkəttaban: «*Ma issanan day awa otas Əməli Məşşina, wala ifrâg a das-əgu ənnəsixa?*» Nakkanay za a igrawan Infas di Zəddigan ən Məşşina nəssân day awa otas Əlməsix.

3

Buləs d Abbolos, imaşşayalan ən Məşşina

¹ Nak amaran, imədrayan-in, harwa xur-wan əlle, wər dawan-təggax awal wa tagga y aytedan win iha Infas wa Zəddigan. Kalar əgey-awan awal zun wa itaggu awedan y aytedan win wər nəlkem ar i tara ən man-nasan, zun əşşewala y aytedan as səket əlkaman y Əlməsix.

² Zun as ax a kawan-əşşəşwa, wər kawan-əssətša imensewan win əqqurnen, fəlas harwa da wər dasan-təfregam. Wala əmərədda da, wər dasan-təfregam,

³ id harwa da wər t-illa a kawan-izlâyan d aytedan win wər nəlkem ar i tara ən man-nasan. Şismiten şin tətəggim fəl midawan-nawan əd təməzaq ta təmmalat gar-ewwan wərgex sitad-danat as harwa da kəl əddənet a tətəlaləm, təlkāmam i tarrayt-nasan?

⁴ As inna iyyan day-wan: «Nak Buləs as əlkama», inna iyyan: «Nak Abbolos as əlkama», wədi wərgex alxal n aytedan n əddənet ta da a təgam?

⁵ Abbolos a da, ənta wala Buləs, awak ma əmosan? Wər nəmos ar imaşşaxalan ən Məşşina, win sər-wan d-ewaynen əzəgzan sər-əs, nak harkid ənta, wər nəga ar əşşəxəl wa danaɣ-ikfa Əməli.

⁶ Nak awa əmmozaɣa, iha şaşşelan n amasa as nak a t-inbalan, təzzar işşəşw-ay Abbolos, mişan Məşşina ənta a t-id-issədwalan.

⁷ Daɣ adi, wərgex awedan wa inbalan amasa wala wa t-işşəşwin a imosan arat; kalar Məşşina a t-id-issədwalan a t-imosan.

⁸ Awedan wa inbalan amasa əd wa t-işşəşwin arat iyyanda a əmosan, akkiyyan daɣ-san ad t-akfu Məşşina alxaq n əşşəxəl-net.

⁹ Nak d Abbolos nədrâw əşşəxəl wa danaɣ-ikfa Məşşina, amaran kawanay a mosnen şilat ən tawagost-net, təmosam dəx əkərrus-net.

¹⁰ Nak, əgex s arraxmat ta di-ikfa Məşşina, əşşəxəl zun wa itaggu əmakras ən nan issânan əşşəxəl-net, əssəxta təsəkbəlt ta təmosat şixurad ən taɣazamt, dəffər adi osa-du awedan iyyan a fall-as ikarras; mişan akk awedan inkədet d əmmək was işatu əkərrus ən taɣazamt tədi.

¹¹ Wər t-illa awedan ifrâgan əsəxti n iyyat təsəkbəlt wər nəmos ta təxtat kala da, ad tat-imosan Ƴaysa Əlməsix.

¹² Wiyyad aytedan əkarrasan fəl təsəkbəlt ən taɣazamt ta, s urəx, wiyyad s azrəf, wiyyad əs təhun əknânen şihussay, wiyyad s eşkan, wiyyad s ələmmuz, wiyyad s agabal.

¹³ Akk awedan ilkâm ad itəwənəy əşşəxəl-net, id ad itəwəsəknu əzəl wa ilkaman,

itəwəjərrəb əs təmsay, fəlas temsay ta ənta a za təsənnəfiləlat əzzənəf n əššəxəl wa iga akk awedan.

¹⁴ Kud təməkrust ta fall-as iga awedan wər tat-tətša təmsay, awedan wədi ad igrəw alxaq-net.

¹⁵ Mišan as imos as tətš-et təmsay, awedan wədi ad affatu. Dər iga awen da ya, ənta iman-net ad ixləs, mišan ad alu əlxillas-net d in awedan ad d-ittirkaban daɣ təmsay.

¹⁶ Awak masnat a wər tęgema as, kawanay iman-nawan a imosan ehan ən Məššina, iha deɣ Infas wa Zəddigan iwallan-nawan?

¹⁷ Amaran awedan kul wa ihallakan ehan ən Məššina, a t-ihlək Məššina; fəlas ehan ən Məššina i zəddigan, amaran kawanay a t-imosan.

¹⁸ Ad wər issudəf awedan waliyyan iman-net alxata. Wa daɣ-wan iɣilan ilə masnat ta fəl təgla əddənət, wədi aget iman-net əmeskel, ad t-akfu Məššina masnat ta n tidət.

¹⁹ Fəlas masnat ta n əddənət ta, əmməskəl a təmos ɣur Məššina, id a ənnan Əlkəttaban: *«Imusanan n əddənət ta, šimərkas šin-nasan as tan-ibaz Məššina.»*

²⁰ Ənnân deɣ: *«İssân Əməli âs, imedranan ən musanan n əddənət ta, wər əzlayan əd bannan.»*

²¹ Daɣ adi, ad wər tədakkalam iman-nawan fəlas təlkamam y awedan, fəlas arat kul i-nawan,

²² gər za nak Buləs wala Abbolos, wala Butros, wala əddənət, wala təməddurt əd tamattant, gər za aratan win əmərədda wala win əlkamnen, awa ketnet i-nawan.

23 Kawanay iman-nawan, Əlməsix a kawan-ilan; Əlməsix amaran, Məşşina a t-ilan.

4

¹ Day adi, nak d Abbolos a dana-wər-itəwəggu iduf wər nəmos ar wa n maşşayalan n Əlməsix, d almawakkilan-net as imos əşşəxəl-nasan emel y aytedan igitan ən Məşşina win dasan-əhanen ətənkul.

² Amaran ma itawaran day awedan imosan almawakkil, ar ad imos awedan n alyadil.

³ Nak əs man-in, wər əzləya day iduf wa day-i təgam wala wa day-i əgan aytedan wiyyad. Nak əs man-in, wər əgey iduf waliyyan day man-in.

⁴ Wər di-təha tərək n ark əmazal waliyyan, mişan wərgəy adi a di-z-ikkəsan. Əməli, ənta a di-z-işrəyan.

⁵ Day adi ad wər təssəwəram awedan waliyyan lahan dat tawaxlay n Əməli s ənta a z'assaknin ezal a mallan arat kul wa itawaggan day əssir, isəffəggu awa ihan iwallan n aytedan. Alwaq wədi, awedan kul ad igrəw xur Məşşina təmmal ta dər ihor.

⁶ Amaran imədrayan-in, ədkâlay-awan-du isalan-in nak d Abbolos fəl ad iqqəl awen almasal a kawan-z-isassagrin batu ta tənnat: «Ad wər takəyam awa ənnan Əlkəttaban». Əgey adi ənta da fəl a kawan-wər-iggəz awedan waliyyan isifaxaran s awedan iyyan alku wa hadan.

⁷ Kay wa itaggan ibaragan, ma kay-izlayan d iyyan awedan? Ma tələx, as wərgəy Məşşina a dak-k-ikfan? Dad zamas awa tələx kul ətəwəkfa

a kay-itawagga bannan, ma əmosan baragan win tətəgga?

⁸ Kawanay əməməddə təlām arat kul wa taram, har as təgərgəsəm! Təqqalam fadda imənokalan ənta nakkanay wər tan nəmos! Nəsidadan a tan-təqqələm əs tidət, fəl a dər-wan nədrəw taɣmar nakkanay da.

⁹ Mišan əs tannay sər-i nakkanay inəmmuzal, ig-ana Məşşina dəɣ ələqqam n aytedan, nola d aytedan issiwar əşşəriɣa tamattant, nətawagga ares n awnaf y əddənət ketnet, gər za aytedan wala angalosan.

¹⁰ Nakkanay za nəqqal s aytedan imeskelan fəl əddəlil n əşşəɣəl wa nətagg y Əlməsix, kawanay amaran təqqalam imalan ən tayttay fəl əddəlil ən tassaɣ-nawan dər-əs. Nakkanay nərkam, kawanay amaran təssohem. Nətiwakyad, mišan kawanay tətiwasaymaram.

¹¹ Nakkanay wala ɣas əməməddə da ih-âna laz, nəffûd, nəzlâm, nətatawat, wər nəla id nəxsar;

¹² izaɣazzab-ana əşşəɣəl ən fassan-nana. Nətattar a igan arraxmat y aytedan win dana-tagginen ark awalan, nəzmâr i win dana-sakninen arkanay.

¹³ Aytedan win ɣaşşadnen ismawan-nana, nəgammay dəɣ-san əs man mallolnen ad am-mazzayan d adi. Har harwa da əgân-anay aytedan şilat ən ferədan n əddənət əd səfraḍ-net.

¹⁴ Wər dawan-in-əktebaɣ aratan win fəl a kawan-əzzəbəza təkarakit, kalar əktabaɣ-awan-tan-in fəl a dawan-aga ənnəsixa, wa z'aga i bararan-in əkne tara.

¹⁵ Amaran kud təlâm maraw gim n əlfəqqi a kawan-sasaxren tarrayt n Əlməsix, da wər təlem ar abba iyyanda, fəlas əzəl wa dawan-əgey isalan ən Yaysa Əlməsix, təlkamam-as, ənta ad əqqala šilat n abba-nawan.

¹⁶ Adi a fəl ədgaza gammaya day-wan a di-tattalalam.

Əzzəna day Əlkənisat

Ədərrəg y əzzəna

Ark aratan wər nəmməkkan win ətawagginen day Əlkənisat

¹⁷ Əddəlil n adi da a fəl sər-wan in-zammazala Timotay ən ruray əknəy tara, issiflasan wəllen day ləkkum-net y Əməli. Əssokax-awan-t-in fəl a kawan-d-assaktu əzzənəf ən ləkkum wa əgey y Əlməsix, s ənta a sassaxra day əlkənisaten kul day adag kul.

¹⁸ Wiyyad day-wan taggin ibaragan, fəlas əxilan wər kawan-in-z-ələsax assa.

¹⁹ Mišan əs turagat n Əməli, a kawan-in-asa day alwaq wər nəggug. Alwaq wədi, aytedan win tagginen ibaragan əddi, ad ənəyax awa əfragan, wərgəy awa gannin xas.

²⁰ Fəlas Taxmar ta n Məššina, imazalan win taggin aytedan əs tarna-net a day tətawanay wərgəy awa əgannin əs mawan-nasan.

²¹ Awak məni day aratan win wa təssofam? A kawan-in-asa ewâyax ələkkud, mey a kawan-in-asax əd tara əd man lammodnen?

5

¹ Aytedan kul gannin ih-iwan awedan itaggin əzzəna, igân təllabəst ta daɣ âs wala aytedan win wər nəssen Məşşina da wər tu-təggin; imosan as ih-iwan aləs itinəmənsin əd təntut n abba-net!

² Eges harwa da tətəggim ibaragan, edag n a kawan-assakmu adi iman, təzəmməzzəyam iman-nawan d awedan wa itamazalan adi.

³ Kud nak wər ɣur-wan əlley s azzat-in, da iman-in əllân ɣur-wan. Amaran awedan wa igan əmazal labasan wədi, obâzaq-qu s əşşəriɣa šilat n as əlley ɣur-wan.

⁴ As təmmənayam gar-ewwan fəl əddəlil n Əməli-nana Ƴaysa, əggəzaq-qawan-in əs man-in wərgex s azzat-in, a fall-awan d-izəzzəbbət Əməli-nana Ƴaysa tarna-net;

⁵ tayyim awedan wədi y Aşşaytan ad təhlək təxəssa-net, fəl ad igrəw efsan əzəl wa n tabad-day.

Əşşəriɣa gər əlməsixitan

⁶ Wər təlem əddəlil waliyyan fadda s igi ən baragan. Awak wər təssenam as, «arat ən xamira a isakafan təbəluləq n agel irwayan ketnet?»

⁷ Əkkəsət daɣ man-nawan xamira wa waşşaran a t-imosan abakkad, tizdagam fəl ad təqqələm šilat ən təbəluləq n agel irwayan wər iha xamira, s ənta a təmosam kala da, fəlas Əlməsix, imos təfaskay-nana ta n amud wa n Akkay, immut daɣ adag-nana.

⁸ Daɣ adi nəssəxməret amud wa n Akkay, wərgex əs xamira wa waşşaran, a t-imosan

iwallan iha əşşur əd talbast; kalar nəssəxməret-tu əs təgəlla ta wər iha xamira, a tat-imosan iwallan zaddognen, təha tidət.

⁹ Day şirawt-in ta dat ta, əktâbəx-awan-in as, ad tu-wər-təməl tassağ waliyyat gar-ewwan d aytedan win tagginen əzzəna.

¹⁰ Mişan ya wər əssoka s adi iba ən tassağ d aytedan win wər nəşşokal day əddənət ta ar day igi n əzzəna, madex win as əffofen wallan-nasan, madex win narkaban əd win əxbadnen əssənəman, fəlas aytedan win di, wər za taqqamim wər dər-san toseyam, ar s ad təgmâdam əddənət ketnet da.

¹¹ Kala kalar a dawan-ganna, ad wər tasəxam d awedan wədi igannin imos amadray-nawan day əddin, ənta wər işşokal ar day igi n əzzəna, iffofat əwəl-net, ixbâd əssənəman, ilâ ark iləs, imos əməşwi n esmad, imos anarkab. Awedan şilat ən wa, wala xas tettay da a dər-əs tat-wər-tədrəwam.

¹²⁻¹³ Fəlas wərgex nak a iwar ad əbəza s əşşərixa aytedan win wər nəzzəgzən s Əlməsix, Məşşina a tan-z-ibəzan s əşşərixa, mişan aytedan win Əlkənisat-nawan, kawanay a iwar a tan-tabəzam s əşşərixa, fəlas ənnan Əlkəttaban: «*Əkkəsət yur man-nawan inəllubas.*»

6

¹ As illam arat gər iyyan day-wan d əmədi-net, ma kawan-issəhalan ad tətakkim aytedan wər nəzzəgzən əs Məşşina y a dawan-əşşrəxan, təxləyam tamattay zəddigat ən Məşşina?

² Awak masnat a wər təgem as, tamattay tədi ənta a za təşrəxat y əddənet? Dağ adi, dad imos as kawanay di da a z'əşrəxnen y əddənet, manəmmək as wər təfregam əşşərixa ən tayawşiwen madrornen?

³ Awak masnat a wər təgem as, wala angalosən, nakkanay a dasan-z-işrəxan, əngəm-in za şığawşiwen n əddənet ta!

⁴ Dağ adi, as t-imal əxşud gar-ewwan day tayawşay iyyat, manəmmək as tətayyim aytedan wər nəmos wala xur Əlkənisat şarrağan-awan?

⁵ Imos fall-awan təkarakit ad imos as, wər kawan-iha awedan waliyyan ilân masnat a tu-təssifragat ad izəmməzzəy əşşərixa i mədrayan-net day əddin.

⁶ Awak ma kawan-igrawan as təşarraşam gar-ewwan har təqqimam əşərrağan-awan aytedan wər nəzzəgzan s Əlməsix.

⁷ Wala ənəməşray wa tətəggim gar-ewwan da agadal zəwwəran a dawan-imos. Mafel wər təzəzzəydaram d iba ən tidət wa dawan-itəwaggan, madəx təzəzzəydearam d əmixi wa tətəwəggim?

⁸ Edag n ad tagim adi, kala kalar kawanay iman-nawan a itamazalan s iba ən tidət, tətəxam aytedan win hadatnen, əs fadda imədrayan-nawan a əmosan day əddin.

Inasbakkadan əd Taymar ta n Məşşina

⁹ Awak masnat a wər təgem as inəllubas wər z'əgrəwan adagar day Taymar ta n Məşşina? Əqqələt-du day əxruk wa təgam, təssənam as iməggan n əzzəna, d aytedan win əxbadnen

əssənəman, əd win tagginen i tədoden-nasan
 šidoden, əd meddan win tagginen iman-
 nasan šidoden əd win tagginen imidawan-nasan
 šidoden,

¹⁰ əd baydagan, əd win as əffofen wallan-
 nasan, əd mašwan n esmad, əd mawayan ən
 tənnawen, əd narkaban, aytedan win kul wər
 əlen adagar daɣ Taɣmar ta n Məššina.

¹¹ Wiyyad daɣ-wan kala ad əhan samal n
 aytedan win di, mišan əmərədda tətivašaradam
 daɣ awen, tətihazazdagam, təqqalam aytedan
 təsisaxad tarrayt n Əməli Ƴaysa Əlməsix d Infas
 wa Zəddigan n Əməli-nana Məššina!

Batu ta təqqalat iki ən təkarwatan

¹² Təgannim: «Arat kul xalal-ana», tidət mišan
 wəgeɣ arat kul təh-ay tənfa. Tidət as «arat kul
 xalal-ana», mišan nak wər z'ayyaɣ arat waliyyan
 ittəf daɣ-i tanat.

¹³ Təgannim deɣ «Isudar, tadist a fəl d-
 əxlakan, amaran tadist, isudar a fəl du-təxlak.»
 Dər iga awen da za, tadist harkid mensewan
 ilkâm ad asabu Məššina tamayyamayt-nasan.
 Taɣəssa n awedan ənta wər du-təxlek fəl ad tagu
 əzzəna. Kalar təxlâk-du fəl ad tagu tara n Əməli,
 s ənta a tat-ilan.

¹⁴ Amaran Məššina a d-issənkaran Əməli
 Ƴaysa daɣ tamattant a dana-daɣ-as-d-issənkər
 nakkanay da, əs tarna-net.

¹⁵ Wər təssenam as, šiyəswen-nawan, šisəllad
 n Əlməsix a mosnat? Daɣ adi manəmmək as
 z'əsərtəya šisəllad n Əlməsix əd təɣəssa ən
 təkarwat? Kala Kala! Wər ilkem ad iga adi!

¹⁶ Məx masnat a wər təgem as awedan wa issərtayan iman-net əd təkərwat, wədi iqqal dər-əs təxəssa iyyadda? Awak wərgex ənnan Əlkəttaban: «*Aləs əd təntut-net ad əqqəlan təxəssa iyyadda*»?

¹⁷ Awedan amaran wa irtayan d Əməli, wədi Infas wa Zəddigan n Əməli a t-ihan.

¹⁸ Darragat y igi n əzzəna. Ibakkadan kul win tamazalan aytedan wər ədrewan arat əd təxəswen-nasan; mišan awedan wa igan əzzəna, wədi iga abakkad immâran təxəssa-net təmosat taslèt n Əlməsix.

¹⁹ Awak masnat a wər təgem as şixəswen-nawan ehan n Infas wa Zəddigan a əmosnat, a kawan-ihân, ikf-âwan-tu Məşşina? Werge kawanay a ilan iman-nawan.

²⁰ Fəlas izinz-iwan-du Məşşina s əlqimat zəwwərat. Dağ adi, səxmərat Məşşina əs təxəswen-nawan.

7

Batu ta təqqalat azalaf

Batu təqqâlat aytedan win əzlăfnen

¹ Amaran dağ batu ta təqqalat isəstanan win di-du-təgam dağ şirawt ta di-du-təktabam, tənnam: «Ofa y aləs ad aqqam wər inamansa əd tantut kuddey ta izlaf.»

² Dər iga awen da za, fəl ədərrəg y igi n əzzəna, əkkulluk n aləs ofa ad ila tantut, əkkulluk ən təntut dey təla aləs.

³ Aget aləs i təxurəs arat was iwwəjjab a das-t-agu, təntut dey taget y aləs-net awen da.

⁴ Tantut wərgex ənta a təttafat tanat day təxəssa-net, aləs-net a ittafan tanat-net. Aləs ənta da, wərgex ənta a ittafan tanat day təxəssa-net; tantut-net a tat-ittafan.

⁵ Day adi ad wər tənəməgdəlam iman-nawan ar s ad tənimardam s adi day temert təskâtam i təwatriwen. As təxrad, təqqəlam təməwit ta təwwəjjabat fəl aləs əd tēntut-net, fəl təksəda n ad ib'as tēnnodam day man-nawan, igrəw sərwan Aššaytan tarrayt s a kawan-ajjarab.

⁶ Arat wa ənnex əddi, turagat n igi-net a kawan-əkfeḡ, wərgex ammar a kawan-sər-əs-əgeḡ.

⁷ Nak əsidarana a dər-i olân aytedan kul, əfrəgan ad aqqamin wər əzlefan; mišan ya akkiyyan day-na əd təhəkkut ta das-iga Məššina. Wiyyad day-na wər əfregan ad wər əzlefan, wiyyad əgrāwan təhəkkut təmosat fərregat y amayras.

⁸ Amaran meddan win as aba šidoden-nasan, əd tədoden šin as aba meddan-nasnat, ofa ad agin awa əgeḡ, aqqamin da wər əzlefan.

⁹ Mišan as imos as wər əfregan adi, wədi əzləfanet; fəlas ofa y awedan ad izləf, aqqam da wər isabbalaglag deran əwəl-net.

¹⁰ Aytedan amaran win əzlafnen, omâraq-qan s as: tantut ad wər tammazzay d aləs-net. Ēməli a innan adi, wərge nak.

¹¹ Mišan as imos as təmməzzay dər-əs, wədi taqqamet wər təzlef, madex taknu d aləs-net təqqəl-tu; aləs ənta da ad wər izəmməzzəy təxurəs.

¹² Aytedan amaran win hadatnen, ənnex-asan:

Amadray day əddin was wər təzzəgzan tantut-net əs Ƴaysa, eges tərda s a tat-ittâf, wədi a tat-wər-izəmməzzəy. Batu tədi, nak a tat-igan, wərge Ƴməli.

¹³ Tantut dəx ta n tamadrayt day əddin, tas wər izzəgzan aləs-net əs Ƴaysa, eges igla irâ a xur-əs təlla, tədi a tu-wər-təfəl.

¹⁴ Fəlas aləs wədi wər nəzzəgzan əddi, zəddîg id tantut-net a təmosat iyyat day mədrayan day zəgzan əs Ƴaysa. Tantut dəx tədi wər nəzzəgzan əs Ƴaysa əddi, təzəddîg id aləs-net a imosan iyyan day mədrayan day zəgzan əs Ƴaysa. Adi a izzəzdagan bararan-nasan, mišan ənnar wər iga adi, bararan-nasan ehan ən taxxaramt a daq-qan əlân.

¹⁵ Dər iga awen day, wa day-san wər nəzzəgzan, gər za aləs wala tantut, as ira əməzzəy ən wa hadan, ammazzayet dər-əs. Amadray day əzəgzan wədi, madəx tamadrayt tədi, wər t-idu-z-iqqəl əşşərixa n adi, fəlas Məşşina, təməddurt iha alxer as ira a tat-təgâm.

¹⁶ Ma issanan, mijas kam ta n təməzzəgzənt əs Ƴaysa a du-z-awəyan s aləs-nam ad igrəw efsan? Kay da, aləs wa n əməzzəgzən əs Ƴaysa, ma issanan mijas kay a du-z-awəyan əs təntut-nak ad təgrəw efsan?

¹⁷ Amaran aytedan win wər nəmos win-di akkiyyan aglet day alxalat ta daq-qu iga Ƴməli Ƴaysa təmos təhəkkut-net, s ənta a iha as t-iyra Məşşina. Ammar wədi a taggay əlkənisaten kul.

Awedan kul aqqamiwet day alxalat ta iha

18 Kud awedan imminkad as t-id-iyra Məşşina, wədi a das-wər-iqqəl adi asakor. Kud dəx awedan wər immənkad as t-id-iyra Məşşina, ad wər igməy d ad itəwəsəmmənkəd.

19 Əmənkəd wala iba-net wərgəx ənta a imosan arat, amazal s ammaran ən Məşşina a t-imosan.

20 Akk awedan aglet dəx alxalat ta iha as t-id-iyra Məşşina.

21 Kud as kay-d-iyra Məşşina akli a təmosax, a kay-wər-işşəwəş adi; mişan as təgrawa tarrayt əs tədarfit, a sər-əs wər tugəya, kalar darfat.

22 Fəlas awedan wa imosan akli as t-id-iyra Məşşina y a tu-təməl tassağ gar-es d Əməli, wədi ad iqqəl adaraf n Əməli. Əmmək di dəx âs awedan wa wər nəmos akli, ənta da as t-id-iyra Məşşina, ad iqqal akli n Əlməsix.

23 Əməli a irzəman fall-awan, isəddərfat-kawan; dəx adi ad wər tayyim aytedan agin-kawan eklan.

24 Imədrayan-in, akkiyyan dəx-wan aglet iga attama-net dəx Məşşina, aqqam ənta da dəx alxalat ta iha as t-id-iyra Məşşina.

Batu təqqalat aytedan win wər nəzlef

25 Amaran dəx batu ta təqqalat aytedan win wər ides azalaf, wər di-ikfa Məşşina ammar waliyyan y-asan; mişan a dawan-agağ ənnəsixa, ənnəsixa di da ig-âwan-tu aləs igrâwan dəx əhənəttə n Əməli tişit n awedan issiflasan.

26 Azzaman n alyazab a fall-anax əganen, dəx adi illa xur-i as, ofa y akk awedan kul ad aglu dəx alxalat ta iha.

27 Kud kay təsımarkasa əd tantut, ad wər təgməya d a dər-əs tammazzaya. Kud wər təzlefa, a dər-əs wər təgməya.

28 Dər iga awen da ya, as təzlafa, wərge abakkad a təgeḡ; tantut deḡ ta wər ides azalaf, as təzlaf, wərgeḡ abakkad a təga; mišan ya aytedan win əzlafnen daḡ azzaman win, ad ənəyan təssust labasat s ənta as areḡ a tan-agəza daḡ-as.

29 Awa fəl dawan-gannay adi, imədrayan-in, as, təsəlkamt n alwaq a nəha da. Daḡ adi a ibazan ḡur əmərədda, wala aytedan win əzlafnen, aginet as šilat n as wər əzlefan,

30 win hallinen šilat n as wər həllin, win falawasnen šilat n as wər falawasan, win du-zanzinen deḡ əttəfanet as arat wa d-əzənzən wər t-əlen,

31 amaran aytedan win sattaymalnen aratan n əddənet ta, a daḡ-san wər zəzzəwen, fəlas arat kul wa itaggan daḡ əddənet ta nəha da, ta n əḡrud a iha.

32 Nak amaran a əreḡ ad tagim təməddurt daḡ kawan-wər-iššəwəš wala. Aləs wa wər nəzlef, ifrâḡ əddəḡuz daḡ igi n aratan win fall-as ira Əməli, fəlas igammay d əmmək was z'igrəz y Əməli.

33 Mišan aləs wa izlafan, šığawšiwen n əddənet a daḡ idaggaz igammay əmmək was tu-za-tiru taḡurəs;

34 təzzar tuzan ənənəyat-net gər tara n igi n awa tara təntut-net d awa ira Məššina. Amaran tantut ta wər nəzlef əd ta wər ides azalaf, əfrâḡnat əddəḡuz daḡ igi n aratan win fall-asnat

ira Əməli, fəlas ərənət ad əskətnat tәмəddurt-nasnat ketnet y əlğibada n Əməli; mišan tantut ta təzləfat, şığawşıwen šin əddənet a day tədaggaz, təgammay əmmək was tat-z-iru aləs-net.

³⁵ Arat wa ənnex da, tənfa-nawan a day-wan t-ənnex, wərgex əzuk iyyan a kawan-sawara. Kalar tara a əgex ad tagim awa inahaggan, təlkəmam y Əməli s əwəl iyyanda.

³⁶ As iga aləs arkawal n azalaf i təmidit-net har d-ewad alwaq wa day ihor a tat-izlaf, amaran iksud əsəkkərəkəd-net, wədi izləfet-tat, kud adi a ira, wər imos awen abakkad.

³⁷ Mišan aləs wa d-inkaran gar-es əd man-net isammarkas as wər z'izləf tantut ta dər imarakan azalaf, amaran imos awedan ifrâğan day man-net, wədi igâ arat ihossayan.

³⁸ Day adi awedan wa issəndan arkawal n azalaf i təmidit-net, iga arat ihossayan; mišan of-ay wa igan tanat n a tat-wər-izləf.

³⁹ Tantut təzlâfat ilzâm-tat amel xur aləs-net iket iddâr. Mišan as t-aba, ad tilu tarrayt n azalaf n iyyan aləs wa tara, eges kundaba wa izzəgzanan s Əməli Yaysa.

⁴⁰ Mišan nak day iduf wa-nin, ogar əbbələl wa za tagu as təqqim wər təzləf. Infas wa Zəddigan ən Məşşina a di-isassagan iduf wədi, amaran Infas en day as əgex iduf n âs əgrâwaq-qu.

Əlyibada n əssənəman

8

Ədərrəg y əlyibada n əssənəman

Tara ən mədrayan-nana win əlməsixitan əd təkatawt-nasan

¹ Day batu ən şan ən təzəgzam şin təwagğanen y əssənəman ta dər-i təssəstanam, tənnam: «Masnat, ketnana nəla day-as arat». Tidət a imos adi, mişan za masnat, adkul ən man a du-tətaway s awedan, as iga awen, tara ənta, əsəssuhi a tətəggu əzəgzan n awedan.

² Awedan wa xur illa as ila masnat, wədi harwada wər issen awas imməkkan ad t-issən.

³ Mişan awedan wa iran Məşşina, izday-tu Məşşina.

⁴ Amaran day batu ən tattay ən şan ən təzəgzam şin təwagğanen y əssənəman, nəssân âs wər t-illa əssənəm imosan əməli, Məşşina iyyanda xas a t-illan imos Əməli.

⁵ Wala ad əttâfan aytedan as əllan-tu əssənəman aggotnen day jənnawan d amaḍal tiwaxbadnen, amaran tidət as əllan-tu,

⁶ da xur-na, Məşşina iyyanda xas a t-illan. Ənta a imosan Abba-nana, ixlak-du awa t-illan kul, s ənta a danax-ilan nəsandu tara-net; wər t-illa dey ar Əməli iyyanda, Yaysa Əlməsix, s əssəbab-net as t-illa arat kul, amaran ənta a danax-ittafan təməddurt.

⁷ Mişan wərgex aytedan kul tewâd masnat-nasan adi. Aytedan win di əs kala əzzəgzanan s əssənəman, harwa da as ətşan isan ən təzəgzəmt y əssənəm, ad əşşəkan iman-nasan, iməl xur-san as isimadas-tan awen.

⁸ Dər iga awen da ya, wərgex tettay n amensay a dana-z-izənnəmihezən əd Məşşina: gər za nətşâ isan win di, wala wər tan-nətşâ, wərmad

dana-za-təfnəz tettay-nasan s arat, wala dəx təşşit-ana sər-əs.

⁹ Eges ya ənkədat əd man-nawan, tarrayt ta təgrawam əddi, a dawan-təssixlalat tettay n amensay kul, ad wər təqqəl təsənkəft y awedan was wər issəhat əzəgzan-net.

¹⁰ Fəlas kay wa ilan masnat tədi, as kay-inay amadray-nak dəx əddin was wər issəhat əzəgzan-net təqqima dəx adag n əlyibada n əssənəman tətatta, ak wərgex a sər-əs d-awəy adi ad ammazray iduf wa iga, təzzar ad itattu isan win təzəgzam y əssənəman ənta da?

¹¹ Dəx adi təssəxrakəx əs masnat-nak ta tagget amadray-nak was wər issəhat əzəgzan-net s ənta da əddəlil-net a fəl aba Əlməsix.

¹² As təbbəkkadam imədrayan-nawan as wər issəhat əzəgzan-nasan əs təməwit tədi, wədi Əlməsix a təbbəkkadam.

¹³ Adi da fəlas, kud amensay wa tatta a z'iqqəlan y amadray-nin təsənkəft, wədi, nak, wər di-ilkem ad əlasəx tettay ən şan, fəl a das-wər-əqqəla təsənkəft.

9

Təbəllant ən Buləs fəl əşşəxəl-net y Əlməsix

¹ Awak nak, wərgex əlləlli a əmosa? Wərgex ənəmmazul ən Yaysa Əlməsix a əmosa? Wərgex ənəyax Əməli-nana Yaysa? Wərgex kawanay iman-nawan tənfa ta du-təgmadat əşşəxəl-in y Əməli a təmosam.

² Kud xur aytedan wiyyad wər əmosax anam-mazul, da xur-wan illikan as əmosaq-qu; adi da

fəlas əzəgzan-nawan s Əməli a imosan ejwal ən tişit-in anammazul n Əməli.

³ Ənta da awa z'anna y a sər-əs əkkəsəy iman-in dağ aytedan win di fall-i ganninen ark aratan:

⁴ Awak nakkanay inəmmuzal alxaq a wər nəla n ad nəgrəw a nətša d a nəšwa dağ əşşəxəl-nana?

⁵ Awak nakkanay tarrayt a wər nəla n ad nidaw əd təntut n iyyan dağ-na təmosat tamadrəyt-nana dağ əddin dağ əşikəl, awa taggin nəmmuzal win hadatnen, taggin-tu dəx mədrəyan n Əməli Ƴaysa əd Butros?

⁶ Məx, nak əd Barnabas Ƴas a wər nəla alxaq n ad nəddər dağ tişit-nana inəmmuzal? Kundaba ad nəddâr dağ əşşəxəl ən fassan-nana?

⁷ Məni dad kala ad itawanay soji irazzaman i man-net əşşəxəl wa itaggu? Wala əmagyak wər nətəttu tənfa ən tawagost-net? Madəx amadan wər nəsəssu ax n aharay a dər inittaf?

⁸ Awak arat a d-inzâm awedan gar-es əd man-net a dawan-ganna da, məx ak Əttawret da awa da a inna?

⁹ Fəlas a inna Əttawret: «Ad wər tədbəxa y azgar təzidizdiyiza dağ alkama itabakkat-ak-tu.» Awak zələyat dağ zəgran a fəl inna Məşşina awen?

¹⁰ Wərgəx əddəlil-nana nakkanay a fəl inna awen? Awalla illikan as əddəlil-nana a fəl ik-tawaktab awen fəl ad agu awedan wa igayyakan tawagost əd wa itabbakken tənfa ta tat-du-təgmadat attama n ad əgrəwan adagar-nasan dağ tənfa ten.

¹¹ Dad zamas nakkanay a d-issədwalan dağ

wallan-nawan tənfa ta du-təfalat Infas wa Zəddigan, awak arat zəwwəran a imos a kawan-d-igməd sər-na a təla əddənət?

^{12a} Kud əllân-tu aytedan as kawan-iwar alxaq-nasan, awak wərgəx ogar-tu wa-nana?

^{12b} Mišan harkid adi, wər dəx-wan nəgmay alxaq n əşşəxəl-nana; kalar nəzmar y arat kul, fəl ad wər nagu arat a z'iqqələn təsənkəft y awedan waliyyan igdəl-as awen tesalay y Əlinjil n Əlməsix.

¹³ Awak masnat a wər təgem as aytedan win şaqqalnen dəx Ahan wa Zəwwəran n Əlxibada, ehan en da a tan-ihakkin isudar-nasan; win əşxalnen dəx xur majmar wa dəx taqqadnat təkutawen, əlân adagar-nasan dəx təkutawen en?

¹⁴ Awen da a inna Əməli, omar s âs, aytedan win tagginen isalan n Əlinjil, əddəranet dəx-as.

¹⁵ Mišan nak wər dəx-wan əgməya alxaq-in waliyyan; wala kattabəx-awan-in aratan win əməərədda fəl a dəx-wan tan-əgməya. Fadda əssofaş a di-iba y a dəx-i ikkəs awedan fərregat n igi n abarag wədi.

¹⁶ Wər ələx tarrayt waliyyat s igi n abarag n as taggaş isalan n Əlinjil; fəlas əşşil a di-imos igi-nasan. Iket alyazab adi iqqəl as tan-wər-əgəx.

¹⁷ Ənnâr tara ən man-in a dəx tagga isalan n Əlinjil, wədi ələx alxaq; mišan dad imos as, igi wa dasan-t-agga ilzâm-i, imos əşşəxəl a di-issiwar Məşşina,

¹⁸ wədi ma imosan alxaq-in? Adi za igi ən salan n Əlinjil y aytedan bannan, wər dəx-san əgməya alxaq waliyyan wa fall-asan ələx dəx igi-nasan.

19 Nak əheɣ tara ən man-nin, wər di-ila awedan waliyyan, mišan əgeɣ iman-in akli y awedan kul fəl ad d-awəy awen əs tašsam n aytedan əzəgzan s Əlməsix.

20 As əggazaɣ Kəl-Əlyəhud ad əqqələɣ šilat n iyyan daɣ-san fəl ad əzzəgzənan s Əlməsix; as əggazaɣ win əlkamnen y Əttawret, ad əqqələɣ šilat n iyyan daɣ-san, kuddeɣ nak wər das-əlkema, fəl ad əzzəgzənan s Əlməsix.

21 As əggazaɣ aytedan win wər nəlkem y Əttawret, ad əqqələɣ iyyan daɣ-san fəl ad əzzəgzənan s Əlməsix; awen wər imos almaɣna-net as wər əlkema y əššəriɣa ən Məššina, kalar əlkâmaɣ-as fəlas əššəriɣa wa n Əlməsix as əlkama.

22 As əggazaɣ aytedan win as wər issohat əzəgzan-nasan, ad əqqələɣ šilat n iyyan daɣ-san fəl ad əzzəgzənan s Əlməsix; təməwit tədi as əqqala arat kul y aytedan kul fəl a daɣ-san səɣəlləsa wiyyad.

23 Taggaɣ adi kul fəl əddəlil n Əlinjil, fəl ad ədrəwa albaraka-net d aytedan win sər-əs əzzəgzənen.

24 Masnat a wər təgem âs, tammazaga aytedan aggotnen a tat-taggaznen, mišan awedan iyyanda a tat-d-itarnin? Daɣ adi azəlat, tagim azzal wa kawan-du-z-isassarnin.

25 Amaran aytedan kul win əganen ənnəyat ən tammazaga, əšinən labasan a ətaggin i man-nasan. Taggin awen fəl ad əgrəwan alak iɣaššadan, as iga awen nakkanay nətagg-ay fəl ad nəgrəw alak wa wər nəɣəššəd.

26 Adi a fəl ozala nak, əzzillaɣa s adag wa

n təzərəst; aheɣ šaššelan n awedan ihakkin imankasan wər nəəsəsikəy.

²⁷ Zaxazzab taxəssa-nin wəllen, əgeq-qat taklit-in, fəl ad wər əgməda tammazaga, aqqama wər əgreway alak, nak wa immâlan Əlinjil y aytedan.

10

Taryəmt fəl əlyibada n əssənəman

¹ Amaran imədrayan-in, wər areɣ a dawan-ijhâl âs, imarawan-nana as d-əgmadan akal ən Masar ketnasan tollây dənnəg-san tagarak, ketnasan dəɣ as ərdayan dəɣ agaraw;

² iha awen šaššelan n âs, ətiwasalmayan ketnasan dəɣ tagarak ten d agaraw wen fəl aššaddat ən tassaɣ ta əgan d ənnəbi Musa.

³ Ketnasan dəɣ ətşân amensay wa fall-asan d-izazzabbat Məšşina dəɣ jənnawan;

⁴ əşwân dəɣ ketnasan dəɣ aman win dasan-d-ikkas Məšşina. Aman win, əngâyan-du dəɣ təhunt a dər-san təddewat ta tan-ikfa Məšşina, amaran təhunt ta, Əlməsix a tat-imosan.

⁵ Mişan harkid awen, tašşam-nasan wər təgrez i Məšşina. Adi a fəl wazawaznat təxəswen-nasan dəɣ taneray.

⁶ Amaran aratan win, əgân əmosan-anay al-masal fəl ad nənkəd, naqqam wər nəsaddaran igi ən talbast ta əgan.

⁷ Ad wər təqqəlam aytedan əxbâdnen əssənəman, awa əgan wiyyad dəɣ-san; id iktâb as: «Təqqim tamattay, tətša, təşwa təzzar təbdad, təggaz tara ən man-net.»

⁸ Ad wər nətaggu dəx əzzəna, şilan awa əgan wiyyad dəx-san, təzzar ihlak dəx-san Məşşina sanatat təmərwən n əgim əd karad dəx əzəl iyyanda;

⁹ wala nagu tənagmayt y Əlməsix awa das-əgan wiyyad dəx-san, təzzar a tan-əddadnat təşşolen, itiba-tan.

¹⁰ Wala dəx təgətəntənam awa əgan wiyyad dəx-san, təzzar ihlak-kan angalos wa n ənabaz ən man.

¹¹ Amaran awen kul igraw-tan fəl ad iqqəl almasal y aytedan, amaran itawaktab fəl a das-nənkəd nakkanay win fəl du-tosa təzərəst n əddənet.

¹² Dəx adi awedan wa xur illa as ənta ikna tebadday, inkədet ad wər ifətəqqət.

¹³ Ətəwəjərrab təgam kul əgân-tu dat-wan aytedan; amaran Məşşina wər d itəqqəl dəx allaman wa kawan-iga, wər z'ardu itəwəgg-awan ətəwəjərrab as wər təfregam. Amaran as tətawajarrabam, a kawan-akfu fərregat ən zəmmerat y-as, ar-awan tarrayt n ədərrəg y-as.

¹⁴ Dəx adi, imaran-in, darragat y əlxibada n əssənəman.

¹⁵ Awal wa itaggu awedan y aytedan əlānen tayttay a dawan-tagga, ənzərat dəx-as kawanay iman-nawan ad tənəyam tidət-net.

¹⁶ Takabart n albaraka ta nətigudəy i Məşşina, as dəx-as nəşwa, awak wərgəx tadrəwt a nəga əddi azni n Əlməsix wa inxalan as t-aba? Tagəlla za ta nətuzan gar-ena! As tat-nətsə, awak wərgəx tadrəwt a nəga əddi təxəssa n Əlməsix?

¹⁷ Id tagəlla iyyadda a imos Əlməsix, nakkanay

dex harkid igət-nana taḡəssa iyyadda a nəmos fəlas ketnana nədrâw tagəlla iyyadda ta.

¹⁸ Ənəyat šikutawen šin taggin Kəl-İsrayil! Ak wərgex aytedan win tanat-tagginen tattin-tanat əddəwan day əlxibada wa taggin i Məššina day adag wa day taqqadnat təkutawen-nasan?

¹⁹ Awak mas gammayaḡ əd tənna-net da? Adis tənna a tagga əssənəm madex imensewan tiwakfanen y əssənəm əmosan arat?

²⁰ Kala kala! A ganna, šikutawen šin di taggin aytedan win n aljahilan almaḡna aytedan wər nəmos Kəl-Əlyəhud, kələsuf as tanat-əkkâtan wərgə Məššina. Amaran, wər areḡ ad tədrəwam arat waliyyan d aljaynan.

²¹ Wər təfregam ad təsassim day takabart ta kawan-du-təsaktit tanaxla ta iga Ƴaysa azni-net fall-awan, təsassim dex day takabart ta day sassin aytedan win əḡbadnen kələsuf. Wər təfregam ad tədarrawam tagəlla ta kawan-du-təsaktit tehakkay ta iga Ƴaysa taḡəssa-net fall-awan, tədarrawam dex tagəlla ta tattin naḡbidan ən kələsuf.

²² Məx tara a nəga ad nəssənkər šismiten day Əməli? Awak norn-ay?

²³ Təgannim: «arat kul i xalalan», mišan wərgex arat kul təh-ay tənfa. Təgannim dex: «arat kul i xalalan», mišan wərgə arat kul iṣatu awedan.

²⁴ A tu-wər-iməl waliyyan day-wan igam-mayan tənfa ta n man-net ənta ḡas, kalar igməyet awa z'anfin imahharagan-net.

²⁵ İsan kul win nazzinen day əssuk, təlâm tarrayt n a tan-tazzanzim, tatsim-tan, da wər

təssəstanam d iguz wa d-əgan,

²⁶ id ənnan Əlkəttaban: *Amaḍal d awa t-ihan ketnet in Əməli.*

²⁷ As daɣ-wan igmay awedan wər nəzzəgzan s Əlməsix a t-in-tasim, təzzar tərḍam as, amensay kul wa issənsa dat-wan, atşat-tu da wər təssəstanam d iguz wa d-iga.

²⁸ Mişan as dawan-inna awedan: «Amensay di itiwakat y əssənəm», wədi a tu-wər-tatşim fəl əddəlil n awedan wa dawan-innan adi, d əddəlil n iduf wa iga.

²⁹ Wər gənna y iduf wa təgam daɣ amensay di kawanay iman-nawan, kalar iduf wa daɣ-as iga awedan wa hadan as ganna. Amaran mafel as di-igaddal iduf n awedan iyyan, igi n arat as ələɣ tarrayt n igi-net?

³⁰ Kud amensay wa tatta har təggodayaɣ i Məşşina as təggazaɣ şin tattay, mafel as di-ilayyan awedan fəl as t-ətşey?

³¹ Daɣ adi, gər za tettay a tətəggim wala təsəssim, a iqqal arat wa tətəggim, agiwat-tu fəl ədkul ən Məşşina.

³² Ad wər təqqəlam təsənkəft y awedan waliyyan, gər za Kəl-Əlyəhud wala aytedan win tan-wər-nəmos wala deɣ aytedan n Əlkənisat ən Məşşina.

³³ Agat awa tagga; nak a igammayan d ad əgrəzaɣ y awedan kul daɣ arat kul; wər gəmməya tənfa i man-nin, kalar tənfa y aytedan aggotnen a gammaya fəl ad əgrəwan əlxillas xur Məşşina.

11

¹ Ǝqqəlat aytedan a di-əttılalnen s əmmək was əttəlala nak da Ǝlməsix.

Ǝlyibada ən Məşşina day Ǝlkənisat

Awa iwaran meddan əd tədoden day Ǝlkənisat

² Emmâlaq-qawan imədrayan-in fəl təkatawt ta di-du-tətaggim day arat kul d iduf wa təgam alyadaten s əmmək was dawan-tanat-əssəbdada.

³ Mişan arex ad təssənam as, aləs kul, Ǝlməsix a imosan əxaf-net; tantut, aləs a imosan əxaf-net; Ǝlməsix, Məşşina a imosan əxaf-net.

⁴ Amaran id iggaz aləs şin əlyibada ən Məşşina day Ǝlkənisat itattar madex igraw emel y aytedan isalan a fall-as d-izizabbat Məşşina, issilsa əxaf-net, wədi izabaz wa das-imosan əxaf təkarakit.

⁵ Eges tantut kul ta tətattarat madex təgrâw emel y aytedan isalan a fall-as d-izizabbat Məşşina, wər təssəwar əxaf-net, day Ǝlkənisat, tədi təzabaz wa das-imosan əxaf təkarakit, şilat n as təsitabalbal.

⁶ Tantut ta wər nəşəwir əxaf-net, tədi təfnəzet anzadan-net! Mişan dad imos i təntut təkarakit afanaz n anzadan madex əsəttəbəlbəl, wədi təssəwəret əxaf-net!

⁷ Aləs ənta wər t-ilzem ad assalsu əxaf-net id Məşşina a t-id-ixlakan əs şaşşelan-net, ikf-ay tanaya şilat ən ta-net; mişan tantut ənta, sayymar n aləs a təmos.

⁸ Fəlas wərge aləs a d-ixlak Məşşina day təntut, kalar tantut a d-ixlak Məşşina day aləs.

⁹ Wərgex dey aləs a d-itawaxlakan fəl əddəlil ən təntut, kalar tantut a du-tətawaxlakat fəl əddəlil n aləs.

¹⁰ Adi a fəl ilzam tantut ad iwâr asannal ən taymar eyaf-net, fəl udəm n angalosan.

¹¹ Mişan ya dat Əməli, aləs harkid təntut, akkiyyan iqqân day wa hadan;

¹² fəlas kud imos as tantut, aləs a du-təgmad, da aləs, tantut a d-igmad, amaran arat kul Məşşina a d-ifal.

¹³ Kawanay iman-nawan ma tənnam: Awak ihôr ad tətattar təntut əs Məşşina day aljamağat n əlməsixitan wər təssəwar?

¹⁴ Awak wərgex əttəbiğat-nawan iman-net, təssosan-kawan as igi ən jəkkad imos təkarakit fəl aləs?

¹⁵ Mişan tantut ənta, ijəkkad almaqam a tat-hakkin? Id Məşşina a das-tan-ikfan y assatar n ayaf-net.

¹⁶ Kud ill-ay awedan amaran irân ad am-mazağ adi, issenet as: Gər za nakkanay wala Əlkənisaten ən Məşşina, wər nəla iyyat alğadat wər nəmos tədi.

Imensewan win saktan n Əməli

Şisəssukay şin tawagganen alwaq wa n mensewan win saktan n Əməli

¹⁷ Amaran ammaran win dawan-tagga da, wər əmosan eməlan-nawan, id imənəyan-nawan win əlğibada wərgex əşitəy a kawan-taggin, kalar ələqqam a kawan-suğulan.

¹⁸ Fəlas arat wa azzaran, wa sər-wan əsleğ âs, id təmmənay aljamağat n Əlkənisat-nawan y

əlxibada, ad təqqələm şizunawen; amaran wər aba a əzzigzanax dağ batu di.

¹⁹ Mişan ya əşşil ad təqqələm şizunawen fəl a dağ-wan təwənəyan win əhornen d ətəwəsəxmər, wərgex?

²⁰ Dağ adi əmənəy wa tətəggim, wər tu-tətəggim y ad tədrəwam imensewan win saktan n Əməli Ƴaysa.

²¹ Fəlas as təggazam šin tattay, akkiyyan dağ-wan ad ihəz dağ amensay wa d-eway atş-ay, ayyu əmidi-net; iqqəl âs, wiyyad dağ-wan za ih-en gələk, amaran win hadatnen isimaswad-tan esmad.

²² Awak inan a wər təlem a dağ tətşam, taşwim? Məx məlka a təgam Əlkənisat ən Məşşina, təzabazam təkarakit win dağ-as wər nəla arat? Ma dawan-z-anna za? A təram a dawan-aga təmmalen olaxnen fəl as təgam adi? Wala ənəmi haz!

Imensewan win saktan n Əməli

²³ Fəlas nak iman-in alxadat ta di-d-oyya Əməli iman-net a dawan-d-oyyex, a tat-imosan as: Ahad wa dağ z'itəwəggu Əməli Ƴaysa dağ fassan, idkal tagəlla,

²⁴ iga igodan i Məşşina, təzzar irz-et, inna: «Tağəssa-nin adi, [tətiwarzat] fəl əddəlil-nawan. Taggat awa da əs təməwit ta da, imos adi isaktan-in.»

²⁵ Zund əmmək en da âs, as ətşan, idkal təkabart, inn-asan: «Təkabart ta, arkawal wa aynayan ən tassağ a təmos gər Məşşina

əd tamattay-net. Arkawal wa, azni-nin a t-isattaddan. I daɣ-as təşwam, tagim adi isaktan-in.»

²⁶ Fəlas id tətşam tagəlla ta, təşwam deɣ daɣ təkabart ta, wədi isalan ən tamattant n Əməli Ƴaysa a tətəggim, har əzəl wa du-z-iqqəl.

Tettay ən mensewan win saktan n Əməli əs təmawit toyadat

²⁷ Awen daɣ a fəlas, i itşan tagəlla ta təmosat isaktan ən təxəssa n Əməli Ƴaysa, madex iga daɣ təkabart ta təmosat isaktan n əzni-net tessay təgat s iba n safrar, wədi ibbikkad təxəssa n Əməli Ƴaysa d əzni-net, amaran ad t-ibəz əşşəriɣa s adi.

²⁸ Daɣ adi akk awedan aşşaggaret iman-net təzzar, alwaq wədi amaran atşu tagəlla ta, aşəw daɣ təkabart ta;

²⁹ fəlas awedan wa itşan tagəlla ta, madex işwa daɣ təkabart ta, wər igra arat wa idraw adi əd təxəssa n Əlməsix Ƴaysa, wədi awedan izzibaz iman-net əşşəriɣa ən Məşşina.

³⁰ Adi a fəl kawan-əhan aytedan aggotnen ən nərkam əd wiyyad aggotnen ən miranan, aba daɣ-wan fadda wiyyad.

³¹ Ənnar nazzâr əs şaggara ən man-nana, wər dana-z-ibəz əşşəriɣa.

³² Dər iga awen da ya, Məşşina itābaz-ana s əşşəriɣa fəl a danaɣ-aɣəd, naqqam wər danaɣ-issertay d əddənet daɣ əşşəriɣa wa ilkaman.

³³ Daɣ adi imədrayan-in, id təddewam y ad tədrəwam imensewan, ad tətəqqalam i mədrayan-nawan!

34a Kud iyyan daḡ-wan ih-ay gələk, atšet daḡ ahan-net təzzar, fəl ad wər iqqəl əməənəy-nawan arat a sər-wan du-z-awəyan a kawan-abəz əššəriḡa.

34b Amaran daḡ batu ta təqqalat šigawšiwən šin hadatnen, as din-oseḡ a tanat-akna.

12

Šihəkkuten šin itaggu Infas wa Zəddigan

¹ Amaran imədrayan-in, daḡ batu ən təmətəkwəyen šin ihakku Infas wa Zəddigan, wər areḡ a daḡ-asnat təjhâlam.

² Təssânam as dat iguz-nawan tarrayt ta n Məššina, aytedan a təmosam əxrâknen, əlkâmnen y əssənəman wər nəšiwil.

³ Awen da fəl areḡ ad təssənam as, wər t-illa awedan a daḡ innoda Infas ən Məššina a du-z-inkəran ad igannu: «Məššina təlxâna Țaysa!» wala deḡ ill-ay awedan ifrâgan ad annu: «Țaysa imos Əməli!» ar s a daḡ-as innoda Infas wa Zəddigan.

⁴ Amaran šihəkkuten əzzənəfan a əmosnat, mišan Infas iyyanda ḡas, a t-imosan Infas wa Zəddigan ən Məššina s ənta a tanat-ihakkin ketnasnat.

⁵ Tarrayen n əššəḡəl əzzənəfan a əmosnat, mišan Əməli di n iyyan as nəḡal.

⁶ Igitan əzzənəfan a əmosan, mišan Məššina di n iyyan a ihakkin aytedan kul masnat n igitan kul win taggin.

⁷ Akk ənalkim igrâw xur Infas wa Zəddigan təhəkkut a tu-təssifragat əşşəxəl imosan tənfanana ketnana.

⁸ Awedan za iyyan ihakk-ay Infas wa Zəddigan igi ən batuten ən təla n əgərri, iyyan amaran ihakk-ay Infas igi ən batuten ən masnat.

⁹ Iyyan ihakk-ay Infas wa Zəddigan əzəgzan, iyyan ihakk-ay fərregat n əzuzəy ən miranan,

¹⁰ iyyan ihakk-ay fərregat n igi ən təlməxjujaten, iyyan igrâw emel y aytedan isalan win fall-as d-izazabbat Məşşina, iyyan ihakk-ay fərregat ən zələy gər təhəkkut ta n Infas wa Zəddigan əd ta tat-wər-nəmos. Iyyan ihakk-ay fərregat n išşiwəl n awalan wər nətawazday, iyyan ihakk-ay əfəssər n awalan win di;

¹¹ mişan Infas wa Zəddigan wa da a itaggin aratan di ketnasan, akk awedan ihakk-ay təhəkkut ta das-ira.

Taxəssa əd təsəllad-net aggotnen

¹² Ənəyat tişit ta təga təxəssa n awedan arat iyyanda igân daɣ təsəllad əknanen igət, eges harkid igət-nasnat, təxəssa iyyadda a əmosnat. Awen da za a əgan aytedan win əlkamnen y Əlməsix, s əntanay a əmosnen təxəssa-net.

¹³ Fəlas gər za nəmos Kəl-Əlyəhud wala aytedan win wər tan-nəmos, gər za nəmos eklan wala illalan, Infas wa Zəddigan wədi da, a daɣ nətawasalməx ketnana, nəqqal təxəssa iyyadda. Ketnana deɣ Infas wa Zəddigan wədi da, a idnayan iwallan-nana.

¹⁴ Amaran təxəssa wər təga daɣ təslət iyyadda, kalar şisəllad aggotnen a daɣ təga.

15 As d-iggad adar inna: «Nak wər di-təla təxəssa id wər əmosax əfus.» Awak ikkâs-tu awen day tişit n iyyat day təsəllad ən təxəssa?

16 As tənna təməzzuk: «Nak wər di-təla təxəssa, id wər əmosax şat.» Awak ikkâs-tat awen day tişit n iyyat day təsəllad ən təxəssa?

17 As təqqal təxəssa ketnet şat, mas z'aslu awedan? As təqqal təxəssa ketnet təməzzuk, mas z'iwət awedan adu?

18 Kalar Məşşina a igan şisəllad day təxəssa, akkiyyat ig-et day adag was ira.

19 As imos as təxəssa ketnet taslət iyyadda a təmos, wədi ma z'iqqəlan təxəssa?

20 Kalar şisəllad əknanen igət a t-əllanen, mişan təxəssa ənta iyyadda.

21 Awen day a fəl wər təfreg şat ad tannu y əfus: «nak wər sər-ək əddərar», wala dəx annu axaf i daran: «nak wər sər-wan əddərar.»

22 Fadda şisəllad ən təxəswen-nana şin n as nəga iduf n as ərkamnat, əntanatay a dana-təha tənfa wəllen.

23 Amaran şin di as xur-nax iga as wər faror-nat, əntanatay a nəssəymar wəllen. Day adi, şisəllad-nana şin əmosnen izuf, əntanatay a nəkannu assatar.

24 Şin wər nəmos izuf amaran, əntanatay wər əddərarnat s assatar. Məşşina iman-net a d-ixlakan təxəssa tosâx, ig-as təməwit a fəl tawasaxmarnat təsəllad-net, wəllen şin əddərarnen s adi,

25 fəl ad wər təzun təxəssa gar-es, kalar əkkulluk ən təslət ad təssən day təmidit-net.

26 Awen day a fəlas, as təlaggay iyyat day

təsəllad ən təxəssa, şisəllad kul šin hadatnen əntanay da, ad laggaynat. As tətawazazwar dəx iyyat dəx təsəllad, şisəllad kul šin hadatnen ad fəliwəsnat.

²⁷ Kawanay təxəssa n Əlməsix a təmosam, amaran akkiyyan dəx-wan taslət ən təxəssa-net a imos.

²⁸ Adi a fəlas Əlkənisat, dəx tizarat iga dəx-as Məşşina inəmmuzal, dəffər-san ənnəbitan; dəffər ənnəbitan, əlfəqqitan; dəffər adi aytedan win əlanen fərregat n igi ən təlməxjujaten, əlkaman-asan win ikfa fərregat n əzuzəy ən təwərnawen, əd win tilalnen y aytedan, əd win ikfa fərregat ən tizart y aytedan, əd win ikfa fərregat n əşiwəl n awalan wər nətawazday.

²⁹ Awak ketnasan as əmosan inəmmuzal? Awak ketnasan as əmosan ənnəbitan? Awak ketnasan as əlfəqqitan? Awak ketnasan as əgrawan fərregat n igi ən təlməxjujaten?

³⁰ Madəx əgrâwan fərregat n əzuzəy ən təwərnawen, meş fərregat n awalan wər nətawazday, meş fərregat n əfəssər-nasan? Wala ənamihaz!

Tara: Tarrayt ta n tidət

³¹ Dəx adi səddirənət s əlluş agaraw ən təhəkkuten šin ofanen! Amaran a kawan-assakna əmərədda tarrayt ta tofat tarrayen kul.

13

¹ Kud əşşewaləş awalan n aytedan harkid win angalosan da, as di-wər-təha tara, wər izlay awal-in d əməsli n anayna madəx əməsli n əylal ən təzoli itatawatan.

² Kud əgrâwa təhəkkut n amel ən salan a d-izizabbat Məşşina, wala əgrâwa əssiran kul əd masnat kul, wala əlêx əzəgzan ikmâlan a di-issifragan əsəggəli n ədɣaxan, da, as di-wər-təha tara, wər əmosax wala.

³ Kud əzuna təla-nin kul i tələqqawen, əskatax iman-in y əlɣibada ən Məşşina har xur-i iməl as oğarax aytedan, da, as di-wər-təha tara wər di-z-anfu adi əs wala.

⁴ Awedan wa taha tara, təh-ay təzaydart, olâx; wər izway y awedan waliyyan, wər itaggu ibaragan, wər idkel iman-net dənnəg aytedan.

⁵ Awedan taha tara wər itəggu əmazal n iba ən təkarakit, wər igəmməy awa tu-z-anfin ənta xas, wər rəxis alham-net, wər itəttəf dəx man ark amazal a das-iga awedan;

⁶ wər t-isədəwit arat wər noyed, kalar tidət a tu-təsadawet.

⁷ Faw izizaydar, faw izzigzan, faw igâ attama, izmâr y arat kul.

⁸ Tara, wər das-ilkem ad təxrâd, təhəkkut n amel ən salan a d-izizabbat Məşşina ilkâm a tu-wər-təlla, ta n əşiwəl n awalan wər nətawazday ad tərəz, ta n masnat ənta da ilkâm a tu-wər-təlla;

⁹ fəlas masnat-nana wər tənda, emel-nana isalan win d-izizabbat Məşşina dəx wər inda.

¹⁰ Mişan as du-tosa alkamalat, awa wər nəkmel ad iba tamayyammat-net.

¹¹ Harwa əmosa barar, awal ən barar a taggaɣ, taggaɣ imedranan win barar, ələx tayttay ta n barar; mişan as əqqalaɣ aləs, oyyeɣ-in aratan win barar dəffər-i.

¹² Əmərəddə nəhannay as, masnat-nana, wala ad təggət, wər təmos wala dəgma n ta təlkamat; izlay-tanat awa izlayan anay n awedan dəx şışšet d anay-net udəm s udəm. Əmərəddə masnat-in wər təkmel, mişan ilkâm ad təkməl, tagu alkamalat ta təga təməzdəyt ta di-iga Məşşina.

¹³ Amaran əmərəddə karad aratan win, a t-əllanen, a tan-imosan: əzəgzan d attama əd tara; mişan wa tan-ogaran tara.

14

Şihəkkuten şin Infas wa Zəddigan d akaras n Əlkənisat

¹ Əgməyat za ad təqqəlam aytedan taha tara; təsəddirənam wəllen agaraw ən mazalan win ihakku Infas wa Zəddigan, wəllen emel ən salan win d-izizabbat Məşşina.

² Fəlas awedan wa ifragan əşşiwəl n awalan wər nətawazday, Məşşina as işşewal wərgex aytedan; id wər t-illa awedan igrân əssiran win as t-ikfa Infas wa Zəddigan emel-nasan.

³ Mişan awedan wa igrawan emel ən salan a fall-as d-izizabbat Məşşina wədi aytedan as işawal, isisuhit əzəgzan-nasan, isasmad iwallan-nasan, italam-asan fəl man.

⁴ Awedan wa işşewalan awalan wər nətawazday, əzəgzan wa-net xas a isisuhit s adi, mişan awedan wa igrawan emel ən salan a d-izizabbat Məşşina wədi Əlkənisat ketnet as isisuhit əzəgzan-net.

⁵ Nak arex ad təşşiwəlam ketnawan awalan wər nətawazday, mişan awa dawan-əssofax, ad

təgrəwam təhəkkut n amel ən salan win d-izizabbat Məşšina. Awedan wa igrawan emel ən salan a d-izizabbat Məşšina, ogar wa igrawan fərregat n əşiwəl n awalan wər nətawazday, ar s ad imos as ifrâg ad itafassar awa igannu fəl a sər-əs isəssuhət əzəgzan n Əlkənisat.

⁶ Amaran əmərədda, imədrayan-in, nənna masalan oseq-qawan-in əşşewaləx awalan wər nətawazday, awak mas kawan-z-anfu adi? Mişan as kawan-in-osex əmaləx-awan arat isi-nafalal Məşšina, madex əşşita masnat ta təlam, madex aga-x-awan batu a fall-i d-izizabbat Məşšina madex əsassa-xraq-qawan təssunt a du-təgmâdat Əlinjil, wərgex a kawan-anfu adi?

⁷ Wala aratan win as tawaggin səwat, nənna masalan təsənsəq madex təhərdant da, as wər əgen ewet olâxan, manəmmək as z'izləy awedan aggay wa əgan?

⁸ Esək dex wa itawansa-xan y ad səmmutəgan aytedan y əməgər, as das-wər-itawagga anasax wa itawassanan, ma z'isəmmutəgan y əməgər?

⁹ Kawanay da za, awen da: as təşşewalam wər tələffədam s əlxərəfan as itiwassan almayn-nasan, man əmmək as z'issən awedan waliyyan awa təgannim? Zun təşşewalam day adu!

¹⁰ Igmâd aşşak âs, əzzənəfan n awalan aggot-nen a əhanen əddənət; mişan wər tan-ihə is wərgex ilə almayna.

¹¹ Amaran as wər əssenəx iyyan day-san, ad əqqələx s awedan wa t-işşewalan awedan ən tama, iqqəl-tu sər-i nak da.

¹² Day adi kawanay da, dad zamas təsidarânam wəllen agaraw ən təmətəkwayen

šin ihakku Infas wa Zəddigan, adi za, əşxəlat dəx agamay ən šin za səssuhətnen əzəgzan n Əlkənisat.

¹³ Awen da a fəlas awedan wa išşewalan awalan wər nətawazday, igməyet dəx Məşşina ad t-akfu fərregat n əfəssər-nasan.

¹⁴ Fəlas as imos as tattara dəx awalan wər nətawazday, iman-in xas a tattarnen, tayttay-in ənta, wər təşxel dəx təwatriwen šin tagga.

¹⁵ Dəx adi ma z'aga? Adi za, ad əttəray dəx man-in, əttəra dəx əs tayttay-in dəx awal isisagran; agax tagaytalt əs man-in, aga-qat dəx əs tayttay-in dəx awal isisagran.

¹⁶ As wər iga adi, as iqqal əs tətəggax igodan i Məşşina əs man-nak xas, dəx awalan wər nətawazday, awak awedan wa tu-wər-nəssen, wa dak-issəsəman dəx Əlkənisat, manəmmək as z'annu i təwatray-nak: «Amin!», ənta wər issen awa təganna?

¹⁷ Illikan as igodan-nak i Məşşina hossayan, mišan wər isassahat adi əzəgzan n aytedan win dak-əssəsəmnen id wər əssenən awa təganna.

¹⁸ Nak tigudəyax i Məşşina as kawan-ogara ketnawan awal dəx awalan wər nətawazday!

¹⁹ Mišan as ahex Əlkənisat, əssofax igi ən wala xas səmmos əlxərəfan a za tawagrinen y ad əzzəbəzax aytedan əlfaydat, igi ən maraw gim n əlxərəf dəx awalan wər nətawazday.

²⁰ Imədrayan-in, uşarat, tammazzayam əd tişit ən bararan! Tidət as, dəx awa iqqalan igi ən təllabəst, əqqəlat şilat ən bararan; mišan dəx awa iqqalan əgərri n aratan win, əqqəlat aytedan əkmələn.

²¹ Ænnan Ælkəttaban: «Inna Æməli: "Tamattay ta, a das-əşşiwəlay dəy awal wər tessen, igmədu sər-san awal wen imawan ən naftayan, mişan harkid awen wər di-z-abbardagan."»

²² Adi a fəlas, əşiwəl n awalan wər nətawazday, asannal n əşşərixa ən Məşşina a imos y aytedan win wər nəzzəgzan, wərgə win əzzəgzannen; as iga awen, awedan wa ikfa Məşşina emel ən salan a d-izizabbat Məşşina, wədi isalan win itaggu, asannal n arraxmat a mosan y aytedan win əzzəgzannen, wərgə win wər nəzzəgzan.

²³ Nənna masalan Ælkənisat ketnet a təddewat dəy adag iyyanda, təzzar əşşewalan ketnasan awalan wər nətawazday, har tan-d-osan aytedan wər nəgra awa imos awen, mədəy aytedan wər nəzzəgzan, wərgəy ad annin əmməskəl a əgan?

²⁴ Mişan as imos as ketnasan əmmâlan awal imosan emel ən salan a d-izizabbat Məşşina har tan-d-osa awedan wər nəzzəgzan, mədəy iyyan wər əhen isalan n awen, ad t-əssusənan awalan kul win as isallu əddi as igâ ibakkadan, issən dəy as ad t-ibəz əşşərixa ən Məşşina;

²⁵ ənta da affaggin aratan kul win əhanen əwəl n awedan wen, təzzar issəjəd i Məşşina, ixbədu, annu: «Tidət as illa Məşşina gar-ewwan!»

Ænnizam dəy alwaq wa n əlyibada

²⁶ Dəy adi, imədrayan-in, mas imməkkan a tu-tagim? Adi za as təmmənayam dəy adag iyyanda, wiyyad dəy-wan aginet şigaytalen, wiyyad sassayrinet aytedan, wiyyad əməlanet awa dasan-isannafalal Məşşina, wiyyad əşşiwəlanet awalan wər nətawazday, wiyyad

affassaranet-tan. Ǝqqəlanet aratan win di kul, arat a z'isəssuhen əzəgzan-nawan.

²⁷ Kud wiyyad daɣ-wan a şawalnen awalan wər nətawazday, ad wər akəyan əşšin aytedan madəɣ karad. Ǝşşiwəlanet s iyyan iyyan, amaran iməl-tu awedan iffəssaran awa gannin.

²⁸ Kud wər t-illa awedan a t-iffəssaran, affastinet, ad wər əşşiwəlan daɣ Ǝlkənisat, əşşiwəlanet daɣ man-nasan gar-essan əd Məşşina.

²⁹ Amaran win əmosnen ənnəbitan, əşşiwəlanet daɣ-san əşšin madəɣ karad, təzzar aşşaggaran aytedan win hadatnen n Ǝlkənisat awal wa d-izzəbben da.

³⁰ Mişan as d-isanaƒalal Məşşina awal y iyyan awedan iqqiman den, awedan wa išşewalan, affastet i wədi.

³¹ Daɣ adi ketnawan təfrâgam ad təmmâlam s iyyan iyyan isalan win d-izazabbat Məşşina y aytedan, y ad təsassaɣrim inalkiman kul, taknim-asan iman ketnasan.

³² Təhəkkut n amel ən salan a d-izizabbat Məşşina, immikkan as innôda daɣ-as awedan wa tat-igrawan.

³³ Fəlas Məşşina wər ira tanajarwayat, kalar ənnizam olâɣan a ira, d alxer, şilat n awa igan daɣ Ǝlkənisaten ketnasnat, əmosnen tamattay zəddigat ən Məşşina.

³⁴ Ad wər şawalnat tədoden daɣ mənnəyan win Ǝlkənisat, fəlas wər əlenat turagat n awen. Kalar abbardagnatet, id adi da as inna Ǝttawret ad t-aginət.

³⁵ Kud ill-ay arat as ərânat a daɣ-as əssənnat,

əssəstannatet meddan-nasnat daɣ aɣaywan; fəlas təkarakit a imos fəl təntut ad təşšiwəl daɣ əməənəy n Əlkənisat.

³⁶ Awak təɣilt a təgam awal ən Məşšina kawanay a d-igmad? Meɣ təɣilt a təgam kawanay ɣas a tiqbalan?

³⁷ Awedan wa daɣ-wan igan iduf n as ənta ənnəbi a imos, madəɣ innoda daɣ-as Infas wa Zəddigan, agret s əlluɣ əs aratan win dawan-kattaba da, alwajib n Əməli a əmosan.

³⁸ Amaran awedan wa wər nəssəfrər adi, wədi ənta da wər tu-z-issəfrər Məşšina.

³⁹ Daɣ adi imədrayan-in, səddirənat wəllen agaraw ən təhəkkut n amel ən salan win d-izazabbat Məşšina; mišan ad wər təgdəlam əşiwəl n awalan win wər nətawazday.

⁴⁰ Adi kul agiwat-tu daɣ əzzəbun d ənnizam.

Tanakra ən ɣaysa daɣ tamattant

15

Isalan ən tanakra ən ɣaysa daɣ tamattant

¹ Imədrayan-in, əməərədda a kawan-d-assaktaɣ Əlinjil was dawan-əgeɣ isalan-net, təzzəgzanam sər-əs, təlkamam-as s əlluɣ;

² Əlinjil di da a kawan-igan daɣ tarrayt n əlxillas, kud təttāfam-tu s əlluɣ s əmmək was dawan-t-əmala. As das-wər-təgem adi, əzəgzan ən bannan a təgam.

³ Fəlas isalan win əgrawa nak iman-in a dawan-əgeɣ, amaran isalan win di, eɣaf-nasan as, Əlməsix, aba-tu fəl əddəlil ən bakkadan-nana, imos as adi da ənnan Əlkəttaban.

⁴ Ennan dey Əlkəttaban, tətawagga taḡəssa-net daḡ təzəkka, as əzəl-net wa n karad d iba, itawasankar-du daḡ tamattant.

⁵ Inafalal-du i Butros, amaran inafalal i nəttulab-net win maraw d əşšin.

⁶ Dəffər adi inafalal i tiddawat ən nalkiman togarat səmmosat təmad n awedan, arat daḡ-san aba-tu mišan taşşam-nasan harwada təddâr.

⁷ Dəffər adi amaran inafalal i Yaqub, dəffər adi inafalal i nəmmuzal kul.

⁸ Dəffər-san ketnasan a di-inafalal nak da Buləs, nak ihân əlmital ən barar a d-ihəwan dəffər as okay alwaq ən təhəwt-net.

⁹ Fəlas nak inəmmuzal kul ogaran-i, wər əweda fadda a di-itəwənnu anammazul, id kala ad əssəknaḡ aytedan win Əlkənisat ən Məşşina arkanay.

¹⁰ A iqqal awa əmosa, dâ, əmosaq-qu s ar-raxmat ən Məşşina, amaran arraxmat ta di-ikfa, wər təbbənnan; fəlas ogaraḡ inəmmuzal kul əşşəḡəl, mišan ya wərgeḡ nak a igan adi, kalar arraxmat ən Məşşina a daḡ-i təşḡalat.

¹¹ Adi a fəlas, gər za nak, wala dey inəmmuzal win hadatnen, isalan win di a nətaggu, amaran əntanay a təzzəzanam.

Tanakra ən nəmməttan

¹² Amaran dad gannin salan win nətaggu, Əlməsix inkar-du daḡ tamattant, manəmmək as gannin wiyyad daḡ-wan, inəmməttan wər daḡ-san təlkem tanakra daḡ tamattant?

¹³ Kud tidət a imos as inəmməttan wər daḡ-san təlkem tanakra, wədi Əlməsix da, wər d-itawasankar daḡ tamattant!

¹⁴ Amaran kud Elməsix wər d-itawasankar day tamattant, adi za təlcutbaten-nana wər əlenat tənfa waliyyat, əzəgzan-nawan sər-əsnaṭ deḡ wər ila tənfa waliyyat!

¹⁵ Amaran arat wədi as iga, nakkanay nəqqal šigəyyawen ən bahu id nətagayyat âs Məššina issinkar-du Elməsix day tamattant; ənta adi wər z'agu as wər təlکم tanakra day tamattant,

¹⁶ fəlas ənnar imos as inəmməttan wər du-za-təwəsənkəran day tamattant, adi za Elməsix da, wər d-itawasankar day tamattant.

¹⁷ Amaran kud Elməsix wər d-itawasankar day tamattant, adi za əzəgzan-nawan wər infa wala, amaran əwâran-kawan bakkadan-nawan;

¹⁸ aytedan deḡ win aba əzzigzanan s Elməsix, əntanay da wər dasan-t-illa attama waliyyan âr wa n əhluk.

¹⁹ Kud nakkanay attama-nana day Elməsix wər okay əddənet ta da ḡas, adi za wər t-illa awedan day əddənet wər noḡer təla ən təhanint.

²⁰ Kalar tidət day a imos as Elməsix itiwəsankar-du day tamattant. Ənta a d-azzaran tanakra, imos awen arat isitaddan as aytedan win aba əzzigzanan sər-əs əntanay da a d-ənkəran day tamattant.

²¹ Id tamattant awedan iyyanda a tat-d-ewayan s əddənet, a t-imosan Adəm; əmmək di da za as tanakra day-as da, tosa-du əs tarrayt n awedan iyyanda, a t-imosan Elməsix.

²² Id aytedan kul a tan-iba fəlas Adəm a d-əḡmadan, əmmək di da za as aytedan kul win osaynen d Elməsix, ad əḡrəwan təməddurt ta təḡlalət.

²³ Tanakra day tamattant amaran, tēgâ s ənnizam: Əlməsix a sər-əs d-azzaran, dəffər adi win sər-əs əzzəgzannen a du-za-təwəsənkərnen xur tawaylay-net.

²⁴ Amaran tasa-du tēzərəst n əddənet, ijəbbərəjjət Əlməsix tēmənukəla kul d əlxəkuman kul əd taymaren šin əttənkalnen, dəffər adi idkəl taymar akf-et i Məššina di n Abba.

²⁵ Fəlas ilzâm Əlməsix ad ittəf taymar har agu Məššina izənga-net kul daw daran-net.

²⁶ Azangaw-net was z'izrəy s ahluk-net, tamattant.

²⁷ Fəlas ənnan Əlkəttaban: «*Iga Məššina aratan kul daw daran-net*», amaran immun as «aratan kul» win as itawanna ad əməlan daw daran-net da, wər tan-iha Məššina, s ənta iman-net a ikfan Əlməsix taymar ta ittaf.

²⁸ Amaran as iga Məššina aratan kul daw daran n Əlməsix, alwaq wədi, ad z'agu Barar ənta da, almayna Əlməsix, iman-net daw əlxəkum ən Məššina wa igan aratan kul daw daran-net fəl ad təkməl tizart ən Məššina y arat kul day adag kul.

²⁹ Amaran ənzərat day aytedan win tawasalmayən day aman fəl əddəlil ən saymar n aytedan-nasan win aba: Awak ma imos awas əgan attama n agaraw-net day igi n awen? Kud ənta tidət day a imos as, wər tu-təlla tanakra day tamattant, wədi ma fel tawasalmayən day aman fəl əddəlil ən saymar n aytedan-nasan win aba?

³⁰ Nakkanay iman-nana za, ma fel akk assayət nəha tazak ən tamattant?

³¹ Akk əzəl təhoz-i-du tamattant! [Imədrayan-nin], arat wədi, ig-as aššak agamad wa iga y əsəbbəræg wa fall-awan tagga fəl əddəlil n awa day-wan iga Ɛməli-nana Ƴaysa Ɛlməsix.

³² Kud təbəllant ta əgeɣ day əɣrəm n Efez, wər nəzlay d aməgər əd wəxsan, wər təga ar fəl ares n əddənet, awak ma di-za-taknu? Kud inəmməttan wər du-za-təwəsənkəran day tamattant, adi za, agatanax awa ənnan aytedan wiyyad as ənnan: «*Natš-et, našwet, fəlas wər day-nax ilkem ar tamattant*»

³³ Ad wər tətəwəsəxrəkam! Fəlas ənnan kəl awal: «*Tidawt d ark aytedan təxaššad alxal olâyan.*»

³⁴ Təqqəlet-kawan-du tayttay-nawan ta tolaɣat, tammazzayam d igi ən bakkadan. Fəlas wiyyad day-wan wər əssenən Məššina. Ɛnnêɣ adi fəl a kawan-izzəbəz təkarakit.

Taxəssa ta du-tənkərat day tamattant

³⁵ Mišan wər igdel awen ad annin wiyyad day-wan: «Awak inəmməttan, məni təməwit tas du-za-təwəsənkəran? Ma təmos təxəssa ta dər du-za-təwəsənkəran?»

³⁶ Aljahilan! As tənbalam tablalt n amasa, wərgəɣ kundaba təmmut as du-təgammad, təddâr?

³⁷ Amasa dəɣ ɣas a tənbalam den, iha mijas in alkama madəɣ tabzəst iyyat, wərgəɣ tasaxtot təɣrâdat a tənbala.

³⁸ Təzzar ikf-ay Məššina təxəssa ta das-ira, əkkulluk n amasa ikf-ay təxəssa ən man-net.

³⁹ Šixəllak wər olenat təxəssa ketnasnat; aytedan zənnit təxəssa ta-nasan, eharay zənnit

ta-net, igədad zənnit ta-nasan, kifitan dəx zənnit ta-nasan.

⁴⁰ Amaran ijənnawan da, əhân-tan aratan əlânen šixəswen, zund əmmək as, amaḍal əwaran-tu aratan əlânen šixəswen; mišan šihussay n aratan win əhanen ijənnawan wər tola əd təhussay ən win əwarnen amaḍal.

⁴¹ Zənnit ənnur wa n təfuk, zənnit wa n təllit, etran dəx zənnit wa-nasan. Etran iman-nasan, ənnur-nasan əzzənəfan a imos, ənnur n iyyan ogar ənnur wa hadan.

⁴² Zund əmmək di da a təga tanakra ən nəmməttan. Təxəssa təxaşşadat a za tənbelat, tətəwəsənkər-du ta wər nətəməttəy.

⁴³ Təxəssa ta dər inbal awedan, təbrâr; ta dər du-z-inkər təkna šihussay. Təxəssa ta dər inbal awedan, tərkam; ta dər du-z-itəwəsənkər təla tarna.

⁴⁴ Inbal-in əd təxəssa ta n əddənət, itəwəsənkər-du əd təxəssa ta iha Infas wa Zəddigan. Da tu-təlla təxəssa ta n əddənət, wədi ta n Infas wa Zəddigan da təll-ay.

⁴⁵ Adi a fəl ənnan İlkəttaban: «*Adəm a d-azzaran y aytedan s əxluk, imal-tu iddâr,*» mišan Adəm wa n əşšin s ənta wa ilkaman, a t-imosan Əlməsix, infas a imos, ihakkin təməddurt.

⁴⁶ Wərgəx wa imosan infas a d-azzaran, kalar wa imosan taxlək n əddənət təddârat a d-azzaran, dəffər-əs a d-osa wa imosan infas.

⁴⁷ Awedan wa d-azzaran, əgodrar a dəx iga, igmad-du amaḍal; awedan wa n əşšin, ənta ijənnawan a d-igmad.

⁴⁸ Awedan wa igan dəx əgodrar, awa imos, ənta a əmosan aytedan win əganen dəx

əgodrar; wa d-igmadan ijənnawan, ənta da, awa imos, ənta a əmosan aytedan win jənnawan.

⁴⁹ Amaran tulat ta nəga d awedan wa igan day əgodrar, ənta a za nagu əd wa d-igmadan ijənnawan.

⁵⁰ Imədrayan-in, a dawan-gannaɣ, awa igan day ʃan d əzni, wər z'ilu adagar day Taɣmar ta n Məššina, wala deɣ ilu awa iɣaššadan adagar day awa wər nəxəššəd.

⁵¹ Səsəmat, a dawan-əməlaɣ əssir: Wər dana-z-iba ketnana, mišan dər iga awen da, ketnana as za nətəwəsəmməttəy,

⁵² fəl arat n amazay, fəl ellaf ən ʃat, ɣur anasaɣ wa ilkaman n asak. Fəlas ad itəwənsəɣ asak, təzzar təwəsənkəran-du nəmməttan əd təxəswen wər za nələs aɣšud, nakkanay deɣ nətəwəsəmməttəy.

⁵³ Fəlas təxəssa ta təxəššadat, əššil ad təggəz ta wər nəxəššəd edag-net; ta tətəməttit deɣ əššil ad təggəz ta wər nətəməttit edag-net.

⁵⁴ As təggəz təxəssa ta wər nəxəššəd edag ən ta təxəššadat, təggəz deɣ təxəssa ta wər nətəməttit edag ən ta tətəməttet, əddi amaran ad z'andu awa ənnan Əlkəttaban as ənnan: «*Tamattant tətəlmaz, tətawarna, ab'as tu-təlla.*»

⁵⁵ «*Ya tamattant, ma təga tarna-nam? Ma iga endal-nam, was təddâgaɣ aytedan tənəqqəq-qan?*»

⁵⁶ Abakkad a imosan endal ən tamattant, abakkad amaran əššəriɣa wa n Əttawret a imosan assahat-net.

⁵⁷ Mišan agoda i Məşšina a danaş-isasarnin abakkad əs tarrayt n Əməli-nana Ƴaysa Əlməsix.

⁵⁸ Day adi, imədrayan-in əkney tara, zəzzəwətat day əzəgzan-nawan, tazzakkem day-as s assahat, ad tətəggim faw s igət əşşəxəl olaşan wa tətəggim y Əməli, id təssânam as, əşşəxəl issohen wa tətəggim y Əməli wər ibbənnan.

Awa d-izdaran day şirawt ta

16

Şirgiten d əşşərədan wiyyad n Əlkənisat

Şirgiten y Əlkənisat ta n Yerusalam

¹ Day batu ta təqqalat şirgiten şin tawagginen i mizdagan win Yerusalam, agat kawanay da, arat was omaray Əlkənisaten şin akal wa n Galatəya.

² Əkkulluk n əzəl wa azzaran day əssuk, akkiyyan day-wan idkâl day awa sər-əs d-iggazan arat was ifrag, ixbər-tu har kawan-in-asa, fəl ad wər iqqəl əşidəw-nawan şirgiten y assa-nin.

³ As kawan-in-osey, ad akfa aytedan-nawan win təsannafranam şira a fəl iktâb as aytedan-in a mosan, təzzar əssuqaq-qan Yerusalam ewâyan şirgiten-nawan.

⁴ Kud deş itawanay âs ihôr ad agla nak iman-in, wədi a dər-i idawan.

Işikilan win d-əzaynen

⁵ Kundaba əmməray əkal wa n Masedonəya as kawan-in-z-assa, fəlas ad ərzəga əkal wa n Masedonəya.

⁶ İha mijas a xur-wan agax adan, mijas dey tagrəst ketnet as xur-wan tat-z-əkkəsax, fəl a di-tagim allawtan kawanay iman-nawan s əkal was kawan-z-əgməda.

⁷ Tidət as wər arex a kawan-in-asa əmərədda, agax-awan-in assa day əzzikke; fəlas əgəx at-tama n ad ahaga xur-wan kud ikf-i Əməli turagat.

⁸ Əmərədda, ad aqqaməy day əxrəm wa n Efez har di day-as d-awəd amud wa n Fantəkawt.

⁹ Fəlas tənnolam-i day-as tarrayt zəwwərat n əşşəxəl, kuddey as əggətan zənga win wər nəra awen.

¹⁰ Amaran as kawan-in-osa Timotay tabəzam-t-in əs man-nawan, a tu-wər-iməl arat as tu-təha tasa-net, fəlas əşşəxəl y Əməli a iha ənta da, şilat-in.

¹¹ Day adi a tu-wər-alku awedan waliyyan; agiwat-as allawtan fəl a sər-i d-agu əşikəl olâxan fəlas əqqâlay-as ənta əd mədrayan-nana win dər iddew.

¹² Day batu ta təqqalat amadray-nana Abbolos: əgmâya day-as wəllen a kawan-in-asu iddew əd mədrayan-nana win di; igmâd aşşak âs wər ila ənnəyat n adi əmərədda. Mişan as igray s adi, a kawan-in-asu.

Ənnəsixatan d assalaman

Ənnəsixatan win əlkamnen

¹³ Agat ənnəyat, təzəzzəwem day əzəgzan-nawan əs Yaysa Əlməsix, təqqəlam aytedan wər təha tasa, təssuhem.

¹⁴ Arat kul wa tətaggim, agiwat-tu əs man taha tara.

¹⁵ Əhân-kawan salan n aytedan n ahan wa n Əstefanos; təssânam as əntanay a əzzarnen s əzəgzan əs Ƴaysa Əlməsix daƣ akal wa n Akayya, əkkâsan deƣ iman-nasan s əššəƣəl i mizdagan. Onsayaq-qawan za imədrayan-in,

¹⁶ a dasan-tabbardagam, əntanay d id t-illa awedan ihân əššəƣəl wa əhan, əs gəlleyat.

¹⁷ Isidawat-i assa wa di-d-iga Əstefanos əd Fortunatos d Axaykos. Assa-nasan idbaƣ-in təxərəbbet ta sər-i d-eway iba n əšinəy-nawan.

¹⁸ Fəlas issəsmad iman-in, issəsmad deƣ win-nawan. Daƣ adi, taget masnat fəl meddan zun win di, təwəsəƣməran.

Assalaman win əlkamnen

¹⁹ Əhulan-kawan-in nalkiman win Əlkənisaten šin akal wa n Asəya. Ihul-kawan-in deƣ Akilas əd Friska əd nalkiman win Əlkənisat ta tətamanayat daƣ ahan-nasan. Əhulan-kawan-in wəllen wəllen fəl əddəlil ən tassaƣ ta nəga d Əməli Ƴaysa.

²⁰ Əhulan-kawan-in mədrayan-nawan daƣ əddin win əllanen da da ketnasan. Tinəməggat assalam zəddigan.

²¹ Təhult awa a din-təgmadat əfus wa-nin nak Buləs.

²² Məššina təƣânaƣ awedan wa wər nərə Əməli Ƴaysa! Marana ta, almaƣna: Ya Əməli-nana asa-du!

²³ Əgmâya daƣ Məššina a kawan-ikfan arraxmat n Əməli Ƴaysa.

²⁴ Əreq-qawan ketnawan fəl əddəlil ən tassaq
ta nəga d Əlməsix Yaysa.

Tamajaq, Tawallammat (Latin)
The New Testament in the Tawallammat Tamajaq
language of Niger, Latin script: Ɛlinjil ən Ƴaysa
Ɛlməsix Itawann-as dəy Arkawal wa Aynayan
Le Nouveau Testament en tamajaq tawallammat,
écriture latine

copyright © 2015 Wycliffe Bible Translators, Inc. et SIM Niger

Language: Tamajaq, Tawallammat

Contributor: SIM International

All rights reserved.

2025-07-09

PDF generated using Haiola and XeLaTeX on 19 Dec 2025 from source
files dated 9 Jul 2025

3aaeb7b2-4a3b-51fe-8c2d-ed8c05d4be0f